

# 1 KOVEENKARIEGI

---

## **Ikamakera Iravi**

**2** <sup>10</sup>Impogini yogari Iravi ikamanai, onti ikitataagani Jerosarenku.  
<sup>11</sup>Onti ipegaka koveenkari 7 shiriagarini anta Everonku. Impo ario okañotaka anta Jerosarenku ipegaka koveenkari 33 shiriagarini. Magatiro apatotakara onti ipegaka koveenkari 40 shiriagarini.  
<sup>12</sup>Impo irirokya pugairi itomi paitacharira Saromon ipegasanotakara igoveenkari egite maganiro iseraereegi.

## **Saromon ikantakerira Tasorintsi irogotagakerira inegintevageigakerira iseraereegi**

**3** <sup>5</sup>Impogini inakera Saromon Gavaonku yogari Tasorintsi ikonea-timotakeri igisanireku ikantiri: “Atsi nevitena tatarika oita pikogake nompakempiro.”  
<sup>6</sup>Inianake irirori ikantiri: “Maika viro Tasorintsi, paio pitsarogakagasanotakari apa Iravi, pineakeritari tera iramatagava-getempa onti inegintevagetaka ikematsa-tasanotakempira. Pikavintsavagetakeri pipakerira itomi pugainerinerira,  
<sup>7</sup>narotari pipegakagake igoveenkari egite iseraereegi nopugairira apa. Kantankicha maika naro noneaka onti nokañotakari ananeki tera nogotumate tyara nonkantaigakeri iseraereegi nonegintevageigakerira, <sup>8</sup>iroogitari pikogakagaigake pashintaigakemparira. Maikari maika itovaigavageigityo kara teratyo iragavei-

matenkani irogoigenkanira. <sup>9</sup>Irorotari maika nokogake nonkantakempira pogotagakenara kameti nogotakera tyara nonkantaigakeri nonegintevageigakerira, aikiro nogotakera tatoita kametitankitsi, aikiro tyati terira onkametite, gatanika tyani gaveimatatsi tsikyata.”

<sup>10</sup>Yogari Tasorintsi ishinetanakatyo ineakera ikantakerira maika <sup>11-12</sup>ikantiri: “Maikari maika iroroventi pikañotakero-tari maika nontsatagagetakempirotyo pikantagetakenarira, teranika iroro pinkantena samanira pinkusogamanetake, aikiro tera iroro pinevitena pashintaarantavagetakempira ontirika pinkantakena nompogereagakerira kisaigimpirira, ontityo pikantakena nogotagakempira pinegintevageigakerira noiseraereegite. Iroroventi maika nogotagakempityo pogovagetakera pavisagakerira maganiro timaigankitsirira pairani, aikiro garatyo itimumatai kañotakempinerira viro.  
<sup>13</sup>Aikiro nompagetakempityo terira pinevigetena pashintaarantavagetakempityo kara, aikiro inkemakoigakempityo maganiro pintsotenkagiteakovagetanakempatyo irishineventaigakempira. Pavisavageigakerityo maganiro koveenkari egi kigonkero pinkamanaera. <sup>14</sup>Aikiro pintsatagasanogetakakerorika magatiro nokantagetirira pinkañotakemparira piri Iravi itsatagagetirora nonkusogamanetagakempi.”

**4** <sup>20</sup>Yogaegiri iseraereegi itovaigavageigityo kara ikañovageiganakaro-

tyo impaneki otsapiakutirira omaraani nia. Ishinevageigakatyo kara tera tatoita inkogakovageigempa. <sup>21</sup>Yogari koveenkari Saromon yashintaigakari maganiro timaigatsirira kara Kanaanku. Ogari igipatsite okaravagetityo okenaatira nia Eoperateshi. Antari kamatikya onti okaratake itimaigira pirishiteoegei ontiri aikiro okaratira Ejipito. Yogari timaigatsirira kara ipakagantageigiri posante-page, aikiro itsatagageigiro magatiro ikantaigiririra kigonkero ikamanaira. <sup>34</sup>Ipokashigeigamatirityo kara itigankai-gakerira koveenkaripage iponiashigeigamatarityo samani ikantaigakerira irogotagaigakerira, ikemakotunkanitari yogovagetira yapagiteakovagetanakatyoka.

#### Saromon yovetsikakerora ivanko Tasorintsi

**6** <sup>1</sup>Antari avisanakara 480 shiriagarini iponiaigaara iseraereegi Ejipitoku yogari Saromon itsititanakero yovetsikanakerora ivanko Tasorintsi. Atake ishiriagakotanaka 4 shiriagarini ipagakara koveenkari. Yogari kashiri itsititantanakarorira inti 2 paitacharira Shive.<sup>a</sup> <sup>11</sup>Impo yogari Tasorintsi ikantiri:

<sup>12</sup>“Pintsatagasanogetakakerorika magatiro nokantagetirira ontiri aikiro magatiro nonkantagetakempirira, nontsatagakempiro nokantakeririra piri Iravi pairani <sup>13</sup>nontimantakemparora pankotsi povetsikakagantakenarira nontimimoigakerira noiseraereegite garatyo nokumaigiri.”

<sup>14</sup>Impo irirori yovetsikakagantakeri ivanko Tasorintsi yagatakagantakerora. <sup>37</sup>...Onti ishiriagakogematakatyo 7 shiriagarini yovetsikakagantakerora.

#### Saromon iniakerira Tasorintsi ivankoku yovetsikakeneririra

**8** <sup>1</sup>Impogini yogari Saromon ikaemakagantaigakeri maganiro itinkamiegi iseraereegi intiegiri itinkamipage iyashikigeiganakerira Iseraere iripokaigakera Jerosarenku inkantaigakeri iriaigakera Shionku itimavetara Iravi iragaigakiterora igajonakite Tasorintsi iramaigakerora Jerosarenku irogaigakerora ivankoku Tasorintsi. <sup>2</sup>...Impogini ipokaigake maganiro iseraereegi yapatoitaigaka kara itentaigakarira Saromon.

<sup>3</sup>Antari yogonkeigapaakara maganiro itinkamipage, yogari saseroroteegi inoshikakoigakerora igajonakite Tasorintsi <sup>4</sup>itentagaigakero igamisapankote ontiri aikiro magatiro nagetankitsirira tsompogi. Yamaiganakero saseroroteegi intiegiri pashini irevitaegi.

<sup>5</sup>Ivatanakeri koveenkari Saromon intiegiri maganiro patoitaigankicharira yovetsikagantaigakenerira Tasorintsi ovisha intiri vaka itovaigavagetiratyo kara tera tyani gaveatsine irogoigakerira kameti intsirinkakoigakerira akatovaini inaigakera.

<sup>6</sup>Impo yogari saseroroteegi yogaigakero igajonakite Tasorintsi tsompogi ivankoku okantaganirira Okantavitantaganirira Onkienkanira. ... <sup>10</sup>Antari ipigaigaara apinakiteneku ogatyo okenake omenkorisetanake tsompogi ivankoku Tasorintsi <sup>11</sup>otsotenkakero magatiro tyampa inkantaigakempa onti ikonteiganai sotsi. Kantamataketyo tsompogi porererere, ipokaketari Tasorintsi kara ivankoku.

<sup>12</sup>Impo yogari Saromon inianakeri ikantiri:

“Viro Notinkami, pikantake onti pitimake pavatsaariku.

<sup>13</sup> Kantankicha maika onti novetsika-kempi pivanko pairorira avisake okametitakera kameti pinkantakaniniri pintimanta-kemparo.”

<sup>14</sup> Impo ishonkateiganakari iseraereegi, aratinkaigamataketari maganiro kara ovashi iniaventaigakeri inkavintsaavageigakerira Tasorintsi. <sup>15</sup> Impo ikanti: “Pairo kametiti Atinkami Tasorintsi shintaigakairira aroegi iseraereegi, itsatagakerotari ikantakeririra apa Iravi pairani ikantaketari: <sup>16</sup> ‘Otovaigavetaka apatogetara pankotsi Kanaanku, kantankicha antari pairani nagaigaatirira noiseraereegite Ejipitoku kigonkero maika tera nonkantumaigeri timageigatsirira kara nokogake irovetsikaigakenara pankotsi anta itimantaigarira kameti nontimantakemparora, kantankicha maika nokogakagakempi pimpegakempara igoveenkariegite.’ <sup>17</sup> Impo yogari apa ikogavetaka irovetsikakenerimera ivanko, <sup>18</sup> kantankicha irirori ikantiri: ‘Kametivetakatyo pisuretakarora povetsikakenara novanko, <sup>19</sup> kantankicha garatyo viro vetsikiro, intityo vetsikakenarone pitomi.’ <sup>20</sup> Impo maika itsatagakero ikantakerira, nerotyo maika narokya pugairi apa nopegaara pigoveenkariegite, aikiro novetsikakeneri ivanko Tasorintsi shintaigampirira.

<sup>21</sup> Antari tsompogi ivankoku novetsikakero aikiro onantaemparira kajonaki onantarira pitetiro mapu itsirinkantagetakarira Tasorintsi ikantaigakeririra yashikiiganakairira yagaigaatirira Ejipitoku.”

<sup>22</sup> Impo yaiñonitanakaro itagantaganirira piratsi yakontsaanake enoku <sup>23</sup> ikanti: “Notinkami Tasorintsi shintaiganarira naroege iseraereegi, mameri pashini kañotakempinerira viro. Mamerityo anta enoku ontiri aikiro aka kipatsiku mamerityo. Panerotari pikantara viro pitsarogakagaigarira kematsaigampirira pitsatagi-

rora pikantaigakeririra. <sup>24</sup> Aikiro pitsatagakero maika pikantakeririra apa Iravi kematsatampirira. <sup>25</sup> Maikari maika nokogake pintsatagakerora pikantakeririra apa pikanti: ‘Inkematsatasanoigakenarika pitomiegi intsatagasanoigakerora nokantagetirira inkañoigakempira viro pitsatagirora kantakanityo intimakera piyashikiiganakerira pegankichanerira igoveenkariegite iseraereegi.’ <sup>26</sup> Maika viro Tasorintsi, atsi pintsatagakerora pikantakeririra apa Iravi.

<sup>27</sup> “Kantankicha maika ñmatsi pagaveake pimpokakera pintimakera aka kipatsiku?, vintitari Tasorintsi. Kañotari anta enoku opiegitagavetakari onti pavisavagetakero, iroromparorokarityo oka pankotsi novetsikakerira naro pairorokarityo pavisavagetakeroty. <sup>28</sup> Kantankicha nogotake pinkemakena nonkantakempirira maika pintsatagakerora. <sup>29</sup> Onti nokogake pinkantakanira pinake aka pivankoku kameti pinkemakena noniapinitempira, pikantaketari viro pikanti: ‘Ario nonake anta.’ <sup>30</sup> Pinkemakena naro intiegiri aikiro piiseraereegite iriniapiniigempira aka. Pinkemaigakerityo aikiro anta enoku pitimira pogavisaakoigakerira pimagisan-takoigakerira ikañovageigara.”

#### Tasorintsi ikoneatimotairira Saromon

**9** <sup>1</sup> Impogini yagatakagantagetakero Saromon ivanko Tasorintsi ontiri irashi irirori ontiri aikiro magatiro ikogagetakerira irovetsikakagantakera. <sup>2</sup> Impo ikoneatimotairi aikiro Tasorintsi igisanireku <sup>3</sup> ikantiri: “Maika nokemakempi piniakenara pikantakera pikogakera nonkantakanira nonake novankoku povetsikakenarira. Maikari maika mataka nashintakaro nonkantakanira nonake anta nompampogiakerora, aikiro noshineventakemparora. <sup>4</sup> Pinkematsatanotakenarika pinkañotaemparira piri Iravi ikematsatanotakenara, aikiro

pintsatagetakerorika magatiro nokantagetirira ontiri aikiro magatiro nokantagetakempirira viro <sup>5</sup>narori nontsatagakero nokantakeririra piri nokanti: 'Inkantakani-tyo imegakempa koveenkari piyashikitanakerira.' Imirinkaegityo pegaigankichane koveenkari piyashikiiganakerira."

**Ishineventakarira Saromon  
ipegagetaganirira tasorintsi kogapage**

**11** <sup>1</sup>Kantankicha impogini yogari koveenkari Saromon yagakero irishinto paraon ontiegiri aikiro pashini tovaini tsinaneegi terira iroro iseraereegi. Ontitari yagake moavitaegi, amonitaegi, eromitaegi, suronioegi ontiri ititaegi. <sup>2</sup>Irooegitari ikantaviigakeririra Tasorintsi iseraereegi ikanti: "Tsikyanira pagumaigikari tsinaneegi timaigankitsirira kara Kanaanku. Antari pagaigakero-rika ontityo oshineventakagaiganakempiri otasorintsiegite." Kantankicha yogari Saromon iroroegityo inintaigake yagaigakerora. <sup>3</sup>Maganiro itsinanetsite onaigake 700, ogari igonkovinate<sup>b</sup> onti onake 300. Impo iroroegi apakuakagaiganakeri tenigera inkematsataeri Tasorintsi. <sup>4</sup>Impo yagatavagetanaara oshineventakagaiganakari ipegagetaganirira tasorintsi kogapage tenigera inkematsataeri Tasorintsi inkañotaemparira iriri. <sup>5</sup>Yaventanakarotari itasorintsiegite suronioegi paitacharira Asetarote. Ario ikañotakeri aikiro itasorintsiegite amonitaegi paitacharira Mirikome ipegakerira itasorintsite yaventanakarira. Yogari Mirikome ivegarikatyo kara. <sup>6</sup>Antari ikañotakerora Saromon maika onti yovetsikake terira onkametite tera intsatagero ikantakerira Tasorintsi inkañotakemparira iriri.

<sup>9</sup>Ovashi ikisanakeri Tasorintsi ineakeritari yapakuanakerira tenigera inkematsa-

taeri, ineavetakatyo ikoneatimotakerira pite, <sup>10</sup>aikiro ikantakerira gara ipegumata pashini itasorintsite, kantankicha irirori tera inkematsateri. <sup>11</sup>Impo yogari Tasorintsi ikantiri: "Maikari pikañotakerora maika teranika pinkematsatena, aikiro tera pintsatagero nokantakempirira irosokyatyo nompegakagaempa ponampiria koveenkari. <sup>12</sup>Kantankicha maika aiñokyara pinake viro gatata nopegakagari, intitari nosuretakotaka piri. Antari impogini imegakempara pitomi koveenkari ario pinkante nonkañotakerora maika, nagapitsaigakerira maganiro iseraereegi, irosokya pegaachane igoveenkariegite ponampiria nokantakempirira maika. <sup>13</sup>Intaganivani nogaiganaeneri pitomi iyashikiiganakerira Jora, intitari nosuretakotakempa nomperane Iravi ontiri aikiro Jerosaren, irorotari nokogake nonantakemparora."

*Impo ovashi itimaiganake kisaigakeririra Saromon* <sup>26</sup>nerotyo imatanakara Jerovoame irirori. Yogari Jerovoame inti itomi Navate iyashikitanakerira Eperain, onti itimake Sereraku. Ogari iriniro onti opaita Seroa. Irorori onti ogamakotaga. Impo irirori itentaigakari pashini yovetsikashiiganakarira koveenkari Saromon inkisaigakerira iokaigakerira.

<sup>29</sup>Impogini iponianakara Jerosarenku iatanakera parikoti itonkivoavakari avotsiku kamantantatsirira Aiashi timatsirira Suroku. Pitenisano itentakari kara. Ogari igamisate Aiashi yogagutakarira enoku onti okyaenkasano. <sup>30</sup>Impo isapokanakaro itisaraagetakero akamantakiegiti onake 12, <sup>31</sup>ikantiri Jerovoame: "Maika noshike viro 10, ariotari ikantakeri Tasorintsi shintaigaririra iseraereegi ikanti: 'Maika nagapitsaigakeri Saromon iseraereegi virokyo nompagaake pimpegakempara igoveenkariegite iyashikigeigana-

**b 11.3** Igonkovinate *su concubina*; kamosotero Jen. 30.4.

kerira 10 itomiegi Iseraere. <sup>32</sup>Irirori intaganivanisano nompagaeri iyashikigeiganakerira Jora, intitari nosuretakotaka nomperane Iravi, aikiro notakarotari Jerosaren, irorotari nokogake nonantakemparora nonimoigakerira iseraereegi. <sup>33</sup>Onti nonkañotakeri maika tenigenika inkematsataena intsatagakerora nokantagetirira inkañotakemparira iriri, ontitari yogagashitanaka Asetarote itasorintsiegite suronioegi intiri Kemoshi itasorintsiegite moavitaegi intiri aikiro Mirikome itasorintsiegite amonitaegi. <sup>34</sup>Kantankicha gatata nokañotiri maika. Kantakatyo imegakempara koveenkari kigonkero inkamanaera, intitari nosuretakotaka nomperane Iravi, irirotari nokogakagake iyashikiigakerira koveenkariegi. Irirori itsatagakerotari magatiro nokantagetakerira. <sup>35</sup>Antari imegakempara koveenkari itomi Saromon ario pinkante iriro nagapitsaigake iseraereegi nompagakempirira viro iyashikigeiganakerira 10 itomiegi Iseraere. <sup>36</sup>Irirori intagani nompakeri iyashikiiganakerira Jora kameti kantakaniri intimakera iyashikitanakerira Iravi Jerosarenku, irorotari nokogake nonantakemparora.”

<sup>40</sup>Impo yogari Saromon ovashi ikoganake irogakerira Jerovoame, kantankicha irirori ishigapitsatanakari-tyo iatakera Ejipitoku iatimotakerira Susako igoveenkariegite Ejipitokunirira. Ario itimake kara ovashi ikamanaira Saromon. <sup>42</sup>Irirori onti ipegaka igoveenkariegite maganiro iseraereegi 40 shiriagarini. Onti itimake Jerosarenku. <sup>43</sup>Impogini ikamanaira ario kara ikitataagani Jerosarenku, itimavetara iriri. Impo irirokya pugairi itomi paitacharira Irovoame.

#### Iseraereegi ikisaigakerira Irovoame

**12** <sup>1</sup>Impogini yogari Irovoame iatake Sukemeku, ariotari iaigakeri maganiro iseraereegi imega-

kagaigakerira igoveenkariegite, <sup>2</sup>kantankicha ikemakotakeri Jerovoame anta Ejipitoku, ariotari inakeri kara ishigapitsatanakarira Saromon. <sup>3</sup>Impo ikaemakagantunkani iatakera irirori aikiro Sukemeku itentaigakerira maganiro iseraereegi iniaigakerira Irovoame ikantaigakerira:

<sup>4</sup>—Yogari piri yatsipereakagavageigakenatyo yomperaperaigakenara. Maika viro atsi gara pikañotari irirori, onti pintsarogakagaigakena ogakona pantsipereakagaigakena kameti nompegaigakempiniri nogoveenkariegite.

<sup>5</sup>Irirori ikantaigiri:

—Atsi piaigaeta impo omavatana-kempa kutagiteri pimpigaigake nonkamantaigakempira.

Ovashi iaigai. <sup>6</sup>Impo irirori ikantaigakeri inampinaegi iriri ikantaigiri:

—¿Tyara pinkantaige viroegi? ¿Tyara nonkantaigeri?

<sup>7</sup>Iriroegi ikantaigiri:

—Pinkavintsaavageigakeririka kametikya pinkantaigakeri pineginteva-geigakerira, iriroegi inkantakanityo inkematsavageigakempi.

<sup>8</sup>Kantankicha irirori teratyo inkematsaigeri yogaegi antarivageiganaatsirira. Irirokya ikogakotagantaigake kañoga-karirira irirori ikantaigiri:

<sup>9</sup>—Viroegiri ¿tyara pinkantaige? ¿Tyara nonkantaigeri kantaigakenarira gara nokañotari apa onti ogakona nantsipereakagaigakeri?

<sup>10</sup>Iriroegi ikantaigiri:

—Onti pinkantaigeri: ‘Yogari apa ogakonatyo ikantaigimpi, kantankicha narori maika pairotyo novashigakovageigakempi. <sup>11</sup>Irirori ogakonatyo yatsipereakagaigakempi yomperaperaigakempira. Maika narori pairotyo nogagaigakempi nantsipereakagavageigakempira nomperaperavageigakempira. Aikiro

ogakonatyo ipasapasaigimpi, kantankicha naro maika pairotyo novashigakovageigakempi nompasapasavageigakempira.’

<sup>12</sup>Impo omavatanakara ipigaka Jerovoame itentaigakarira maganiro iseraereegi, ariotari ikantaigakeriri Irovoame. <sup>13</sup>Kantankicha irirori teratyo iroro inkantaigeri ikantaigavetakaririra inampinaegi iriri, <sup>14</sup>ontityo ikantaigakeri ikantaigakeririra kañoigakaririra irirori. Impo ikantaigiri:

—Yogari apa ogakonatyo yatsipereakagaigakempi yomperaperaigakempira. Maika narori pairotyo nogagaigakempi nantsipereakagavageigakempira nomperaperaigakempira. Aikiro ogakonatyo ipasapasaigimpi, kantankicha naro maika pairotyo novashigakovageigakempi nompasapasavageigakempira.

<sup>15</sup>Teratyo inkematsaigeri ikantaigavetakarira ogakonara iratsipereakagaigakeri. Ario okañotaka maika, irirotari kogankitsi Tasorintsi ontsatagakempira ikantakeririra kamantantatsirira Aiashi impo irirokya kamantakeri Jerovoame itomi Navate. <sup>16</sup>Impo ineaigakera tera inkematsaigeri ikantaiganake:

“iIroroventi maika inkantenityo Iravi intiegiri iyashikiiganakerira!

iTamenityo aigaera!

iYogari Irovoame kantetyo impegakempira igoveenkariegite iitaneeqi!”

Ovashi iaigai. <sup>17</sup>Impo ipegaka Irovoame igoveenkariegite iyashikigeganakerira Jora. <sup>18</sup>Impo itigankakeri Arorame inkamosogeigakerimera iseraereegi, irirotari kamosoiginiririra koveenkari iragaiganakerira iromperaperaigakempirira. Kantankicha ineaigavakerira ipitankaigavakeri ovashi ikamake. Yogari Irovoame yomatematanakatyo ishigakotantariraku ishigapanuta Jerosarenku <sup>19</sup>ovashi maganiro iseraereegi ikisaiganakeri iyashikiigana-

kerira Iravi tera inkematsaigaeri kigonkero maika.

<sup>20</sup>Impogini ikemakoigakerira Jerovoame ipigaara ikaemakagantaigakeri iripokakera irapatoventaigakempirira. Impo ipokake ipegakagaigakeri igoveenkariegite. Intaganivani kematsaigairi Irovoame iyashikiiganakerira Jora.

### Ikañoavagetakara Jerovoame

<sup>25</sup>Impogini yogari Jerovoame yovetsikagetairo pankotsipage timavetankicharira Sukemeku otishiku paitacharira Eperain ovashi itimake kara. Impo irorokya iatashitake yovetsikagetairora pankotsipage timagevetankicharira Penoeeriku.

<sup>26-27</sup>Impo isuretanaka ikanti: “Antari iriatapiniigaerika iseraereegi Jerosarenku iramapiniigaenerira Tasorintsi piratsi intagakagantaigakerinerira ivankoku ontirorokari irishineventaiganaempari Irovoame igoveenkariegite iyashikiiganakerira Jora narokya irogaigake.”

<sup>28</sup>Impo ikaemaigakeri itovaireegi ikogakotagantaigakeri tyara inkantakempa ganiri okañota maika. Impo ikemaigakerira ovashi yovetsikakagantake piteni toro akamotiakyaniirira, inti yovetsikantagetakari kori. Impo ikantaigiri maganiro: “Maikari maika, viroegi iseraereegi, gara patsipereaigai piaigakera Jerosarenku. Maika neri yoka pimpegaigakerira pitasorintsiegite, irirotari gaigaatiririra yashikiiganakempirira Ejipitoku.”

<sup>29</sup>Paniro yogake Vetereku, yogari irapitene onti yogakeri Iranku. <sup>30</sup>Onti ikañoavagetagaigakeri maganiro, maganirotari iatapiniigake ikanagaventaigakarira. <sup>31</sup>Aikiro yovetsikagetake itaganta-ganirira piratsi otishipageku, aikiro ipegakagaigakeri pashini saseroroteegi terira iriroegi iyashikiiganakerira Irevi.

**14** <sup>20</sup>Irirori ipegaka koveenkari 22 shiriagarini impo ikamanai. Irirorkya pugairi itomi paitacharira Narave.

**Pairotyo yogagaigaka  
yovetsikagisevageigakera  
iyashikiiganakerira Jora**

<sup>21</sup>Antari ipegakara Irovoame igoveenkariegite iyashikiiganakerira Jora onti ishiriagakotaka 41 shiriagarini, impo ipegaka koveenkari 17 shiriagarini anta Jerosarenku. Ogari Jerosaren irorotari ikogakerira Tasorintsi irinantakemparora irinimoigakerira iseraereegi. Yogari iriri Irovoame irorotari Saromon. Ogari iriniro onti opaita Naama. Irorori onti amonita.

<sup>22</sup>Impogini yogaegiri iyashikiiganakerira Jora pairotyo yogagaigaka yovetsikagisevageigakera terira onkametite yotsimajigakerira Tasorintsi yavisaigakerityo yotsimajigakerira yashikiiganakeririra, <sup>23</sup>yovetsikaigaketari itagantaganirira piratsi otishipageku, aikiro yagaigake ogatsantsamapupageni mapu ontiri aikiro inchapoapage<sup>c</sup> ikañotagaigakarira ipegagegirira itasorintsite kogapage yogaratinkeigakero kara otishipageku ontiri aikiro otapinapageku inchatogashimponi, <sup>24</sup>itentagantaigakarora aikiro yagavakagaiganakara irapisurariegitene. Ikañotagasanoigakarotyo yovetsikagisevageigakerira iokaigakerira Tasorintsi kara kameti irirokyaniri timaigaatsine.

<sup>25</sup>Antari ishiriagakotanakara Irovoame 5 shiriagarini ipegakara koveenkari, ipokashitakeri Susa igoveenkariegite Ejipitokunirira yomanatakarira kara Jerosarenku <sup>26</sup>ovashi yagagetutaiganakeri perata intiri kori nagetatsirira ivankoku intiri aikiro nagetatsirira ivankoku Tasorintsi. Itsonkatasanogetutanakerityo magatiro yagagetutanakerira. ... <sup>30</sup>Impogini ikisavakagunteigakatyomirinka Irovoame itentakarira Jerovoame yomanatavakagaigakara.

<sup>31</sup>Impogini ikamanaira Irovoame onti ikitataagani kara Jerosarenku itimavetara Iravi. Impo irirokya pugairi itomi paitacharira Aviame.

**15** <sup>3</sup>Ario ikañotaka irirori yovetsikake posantepage terira onkamekite ikañotakarira iriri, tera iriro inkañotaempa Iravi kematsatsasanotiririra Tasorintsi. <sup>8</sup>Impogini ikamanai ikitataagani Jerosarenku itimavetara Iravi, impo irirokya pugairi itomi paitacharira Asa. <sup>11</sup>Iriro pinkante ikematsatsasanotakeri Tasorintsi ikañotaarira Iravi ikematsavagetirira. <sup>24</sup>Impogini ikamanai ikitataagani Jerosarenku itimavetara Iravi, impo irirokya pugairi itomi paitacharira Josapate. <sup>25</sup>Antari aganakara piteti shiriagarini ipegakara Asa igoveenkariegite Jora, yogari Narave itomi Jerovoame ipegaka igoveenkariegite iseraereegi. Intagati ipegaka koveenkari piteti shiriagarini. <sup>26</sup>Onti ikañotaari iriri yovetsikakera tovaiti terira onkamekite. ...

*Impogini avisanakara piteti shiriagarini yogari Vaasa yogakeri Narave ipugakerira. Irirori onti ipegaka koveenkari 24 shiriagarini impo ikamanai. Irirokya pugairi itomi paitacharira Era. Irirori onti ipegaka koveenkari piteti shiriagarini, yogakeritari iromperane paitacharira Sumiri ipugakerira, kantan-kicha agavetanaka patiro tominko onti ikisashitaka ipotakotaka ivankoku. Irirokya pugairi Omiri.*

**16** <sup>25</sup>Yogari Omiri pairotyo yogagaka yovetsikakera terira inkogero Tasorintsi yavisaigakerityo iketyorira pegaigankicha koveenkari. <sup>28</sup>Impo ikamanai ikitataagani

**c 14.23** Ogari inchapoapage onti ikañotagaigakarora itasorintsite paitacharira Asera. 1 Kov. 16.33; 2 Kov. 18.4-5; 21.3.

Samariaku. Irirokya pugairi itomi paitacharira Akave. <sup>29</sup>...Impo yogari Akave onti ipegaka igoveenkariegite iseraereegi 22 shiriagarini, onti itimake Samariaku. <sup>30</sup>Ario ikañotaka irirori yovetsikake terira inkogero Tasorintsi pairotyo yogagaka yavisakeri iriri. <sup>31</sup>Tera patiro onake irishineventakemparora yovetsikakerira Jerovoame itomi Navate, ontityo yagakero aikiro Jesavere irishinto Etavaare igoveenkariegite suronioegi ovashi ishineventanakari ipegaigirira itasorintsiegite paitacharira Vaare. <sup>32</sup>Yovetsikakeri ivanko Vaare Samariaku impo imatakeneri aikiro tsompogi itagantaganirira piratsi. <sup>33</sup>Impo yovetsikake aikiro ikañotagakarora itasorintsiegite paitacharira Asera. Pairotyo yogagaka yavisaigakeri maganiro koveenkariegi ovashi yotsimaakeri Tasorintsi.

**Ikantakera kamantantatsirira  
Eriashi gara oparigai inkani**

**17** <sup>1</sup>Impogini yogari kamantantatsirira Eriashi timatsirira Tiseveku Garaareku ikantiri koveenkari Akave: “Maika nonkamantakempi garatyo oparigumatai inkani, onti osariguntevegetanake, intitari kantankitsi Tasorintsi shintaigaririra iseraereegi, irirotari nokematsati naro. Garatyo oparigumatai, aikiro gara otsinkavatsai matairo kipatsi kigonkero nonkantaera naro omparigaera impo ario ompari-gae.”

<sup>2</sup>Impo iniakeri Tasorintsi Eriashi ikantiri: <sup>3</sup>“Maika plate oatakara ikontetira poreatsiri pomanakempara niateniku paitacharira Keriti nankitsirira okatinkatakotira Jororan. <sup>4</sup>Iroo poviikakempa oga niateni, mataka nokantake impapiniigakempira tsimeri piseka.”

<sup>5</sup>Impo irirori ikematsakeri iatake itimake niateniku Keriti nankitsirira okatinkatakotira Jororan. <sup>6</sup>Yogari tsimeri yamapiniigakeri pan intiri ivatsa ipapiniigakerira tsitekyamani ontiri inanaira shavini poreatsiri. Onti yoviikaka niateni. <sup>7</sup>Impogini opiriata-nake, teranika omparigumatae inkani.

<sup>8</sup>Impo yogari Tasorintsi ikantiri Eriashi: <sup>9</sup>“Maika plate Suronku apatotara pankotsi paitacharira Sarepeta pintimakeri anta. Karari kara aiño paniro ogamakotaga pakempinerira piseka, matakataru nokantakero ompakempira.”

<sup>10</sup>Ovashi iatake. ...

**18** <sup>1</sup>Impogini avisanakara mavati shiriagarini yogari Tasorintsi iniari aikiro ikantiri: “Maika plate pinkamosotaerira koveenkari Akave impo naro nogivarigaero inkani.”

<sup>2</sup>Impo iatake inkamosotaerira. ...

<sup>16</sup>...Antari ikemakotavakerira Akave, iatake itonkivoavakari <sup>17</sup>ikantavakeri: —iPokakevi! Vironiroo kañotagantagakeririra maika maganiro iseraereegi.

<sup>18</sup>Irirori ikantiri:

—Teratyo naro kañotachane. Vintiegi-tyo kañoigankicha papakuaiganakero-tari ikantagetirira Tasorintsi tenigera pintsatagaigaero, irirokya pogagashiiganaka ipegagetaganirira tasorintsi kogapage. <sup>19</sup>Maikari maika atsi pampa-toitaigakenarira maganiro iseraereegi otishiku Monte Karemeroku. Iriaigakera aikiro yogaegi 450 kamantantaigatsirira irashiegi Vaare intiegiri aikiro yogaegi 400 kamantantaigatsirira ashiegi Asera, iriroegitari sekatioimogaro Jesavere.

**Eriashi intiegiri kamantantaigatsirira  
irashiegi Vaare**

<sup>20</sup>Impogini yogari koveenkari Akave ikaemakagantaigakeri maganiro iseraereegi yapatoitaigakeri kara otishiku Monte Karemeroku itentagan-



taigakari aikiro maganiro kamantantai-gatsirira. <sup>21</sup>Impo yogari Eriashi yaiñoniiganakari maganiro ikantaigiri:

—Maika çakasamaninivatorokari pinkañoigakempara maika pinkantaigavetakempara iriro pinkematsaigake Tasorintsi impo irirokya pimaigavake Vaare irirori paventaigavakemparira? Irirorika tasorintsitasanotankitsi Tasorintsi pimpanirotasanoigakerityo. Antari irirorikara tasorintsitasanotankitsi Vaare irirottyo pimpanirotaganake.

Kantankicha iriroegi teratyo iriniimaige.

<sup>22</sup>Impo irirori ikantutaigaarittyo aikiro:

—Panivanisanotyyo nokantakara naro nanti kamantantatsirira kematsatiririra Tasorintsi. Yogaegiri kamantantaigatsirira irashiegi Vaare año 450. <sup>23</sup>Maika pamaigakera piteni toro. Iriroegi iragaigake paniro intoigakeri irogiripegai-gakerira irapatotashiigakeri tsitsi, kantankicha gara itagashiigiri. Impo narokya togetakerine irapitene nampatota-shitakeri tsitsi, ario nonkañotake naro gara notagashitiri. <sup>24</sup>Impo viroegi piniaigakerira pitasorintsiegite. Ario nonkañotake naro noniakeri Tasorintsi. Impo tyanirika kemankitsine irogivarigakerora tsitsi intagakerira piratsi ipunkanirira iroroventi irirottyo tasorintsitasanotankitsi.

Ishineigamatanakatyó maganiro ikantaigi:

—Kametitake.

<sup>25</sup>Impo irirori ikantaigiri kamantantai-gatsirira irashiegi Vaare ikanti:

—Maika viroegi pitovaigaketari viketyoegi gaigankitsine toro pintogeigakerira pogantaigakemparira pintagantaigakemparirira, kantankicha gara pitagashiigiri. Impo piniaigakerira pitasorintsiegite.

<sup>26</sup>Iriroegi yagaigakeri toro ipaigunkanirira itogeigakerira yogantaigakarira intagantaigakemparirira, impo iniaigakeri

itasorintsiegite ikaemaiganake ikantaigi: “iVaaree, kemaigena! iGivarigateigena tsitsi intagakempara toro novetsikashiigakempirira!” Ario ikañoigakero maika itsitiigamanakero tsitekyamani ovashi ikatinkavagetanake poreatsiri, kantankicha mamerityo teratyo iriniimate, aikiro teratyo omparigumate tsitsi. Iriroegi ipiriniventaigakerityo itosoventaigakerira. <sup>27</sup>Impo ikatinkatanakera yogari Eriashi isamatsanaigakerityo ikantaigiri:

—Atsi pairorattyó pinkaemasanoigake, intitari tasorintsi ontirorokari ipitake isuretasanotakara. Terira ontirorokari yantavagetake, ontirika tyarika iatake. Impa ariorakari imagaake atsi pogireai-gakerira.

<sup>28</sup>Iriroegi pairotyyo ikaemasanoiganake ikaemageigamatityo kara, aikiro kitenkanaganakatyó kotsiroku ontiri savuriku yovoatagaiganakara iriraa ariotari yogameigari ikañoigara maika kitenkaventaigarira itasorintsiegite ineaigiri ariori inkemaigakeri. <sup>29</sup>Impo ineaigakera tera inkemaigari ariompatyyo yovashigakoiganakari ikaemasanoiganakera kara ovashi inakovageiganake shavini, kantankicha teratyo iriniimate, aikiro tera omparigumate tsitsi. <sup>30</sup>Impo yogari Eriashi ikantaigiri maganiro patoitaigankicharira:

—Maika atsi tinaeigi aka naroku.

Maganirottyo iaigake iriroku. Impo irirori yovetsikanairo ogantagarira itagantaganirira piratsi yamaganirira Tasorintsi, otuanaketari. <sup>31</sup>Oketyo yagake 12 mapu ikañotagaigakarira itomiegi Jakovo inaigira 12. (Irirotari Jakovo ikantakerira Tasorintsi: “Ariokya pimpaitaempa Iseraere.”) Impo ogari mapu yagagetakerira <sup>32</sup>irorotari yovetsikantaaro itagantaganirira piratsi. Impo ikitsatakero yonkuatakotakero omonkaratakemparo otsatani 20 potiria nia.<sup>d</sup>

<sup>33</sup>Impo yapatotake tsitsi. Itogetakeri toro yogiripegetakeri yogagetakeri tsitsiku

<sup>34</sup>ikantaigiri naigankitsirira kara:

—Maika gaatashiigero nia omarapageniku koviti onake 4 pisaguigakerira toro ontiri tsitsi.

Iriroegi isaguigakero. Impo ikantaigiri:

—Maigaero aikiro.

Imaigairo aikiro.

Impo ikantaigiri aikiro:

—Pimaigaerora aikiro.

Imatutaigaarotyo aikiro <sup>35</sup>ovashi oyagiatantanakaro ikitsatakerora oshatekaatanakarora. <sup>36</sup>Impo aganakara itagapinitaganira piratsi yamaganirira Tasorintsi yogari Eriashi yaiñonitanakaro iniakeri Tasorintsi ikantiri: “iNotinkami Tasorintsi, virotari ikematsaigi Averan, Isaako intiri Iseraere! iMaika nokogake pineakagaigakerira maganiro vinti Tasorintsisanorira shintaigaririra iseraereegi, narori nanti pomperane, aikiro virotari kantakena nonkañotakerora maika! <sup>37</sup>iMaika nokogake pinkemakenara pogivarigakerora tsitsi kameti irogoigakeniri maganiro vinti Tasorintsisanorira kantatigaigakerineririra inkematsaiganaempira viro!”

<sup>38</sup>Impo yogari Tasorintsi yogivarigutarotyo tsitsi otaganakerira toro otentagantanakarira tsitsi yapatotashita-keririra ontiri mapupage ontiri kipatsipane. Magatirosanotyo otagakero nia shatekaatankicharira otsateniku.

<sup>39</sup>Antari ineaigakerora maganiro yompatakaigamatanakatyo ikantaigi: “iInti tasorintsitasanotankitsi Atinkami Tasorintsi! iInti tasorintsitasanotankitsi Atinkami Tasorintsi!”

<sup>40</sup>Impo ikantaigiri Eriashi:

—iIrikaigeri maganiro yogaegi kamantantaigatsirira irashiegi Vaare ganiri ishigumatanaka paniro!

Impo iriroegi yairikaigakeri. Yogari Eriashi yamaiganakeri niateniku

paitacharira Suson. Ario kara yogamaigakeri maganiro yovatuagakerira.

### **Eriashi ikantakerira Tasorintsi irogivarigaerora inkani**

<sup>41</sup>Impogini yogari Eriashi ikantiri Akave:

—Maikari maika plate pisekatakempara pishinetakempara, kemagantapaa-katari omarane inkani.

<sup>42</sup>Irirori iatake isekatavagetakara.

Yogari Eriashi itonkoanakero ochovaankakera otishi Monte Karemero ipirinitapaake yogivosetanakara igeretoku iniakerira Tasorintsi. <sup>43</sup>Impo ikantiri ironampiria:

—Atsi plate pineventuterora omaraani nia.

Iatake ineventavetakara ikantiri:

—Mameri, tera tata nonee.

Impo itigankairi impigapigatakera.

Ario ikañotakero. <sup>44</sup>Antari aganakara 7 ipigakara ikantiri:

—Maika noneake maani menkori akachapatisano kañomatata isarantapakomatsigenka oponiapaaka omaraaniku nia.

Irirori ikantiri:

—Maika platepage pinkantakerira Akave iromatetanaempara ishigakotantarira iriataera ganiri otikiri inkani.

<sup>45</sup>Iroro ikantakera ogatyo okenake aamokanake otampiatanakera oparigamatanaketio inkani jiririririri omaranerikatyo kara. Yogari Akave ishigakotanaa iataira ivankoku Jesereereku,

<sup>46</sup>kantankicha yogari Tasorintsi ishintsitakeri Eriashi nerotyo iatakera ishigavagetanaka yavisanakerira irirori iketyo ivatanankitsi kigonkero yogonke-vegetakara Jesereereku.

### **Ishiganakara Eriashi Oreveku**

**19** <sup>1</sup>Impogini yogari Akave ikamantagetaapaakero itsinanetsite magatiro yovetsikagetakerira Eriashi ontiri aikiro yogutakerora kamantantagatsirira irashiegi Vaare. <sup>2</sup>Impo irorori

okantakagantakeri Eriashi inkantakitenkanira: “iPikañovintsatakerora maika ariotyo nonkañotagakempi viro aikiro nogakagantakempityo! Kamani onkañotanakempara maika mataka kamakevi. Antari garika nogakagantimpi inkisashiigakenatyoto notasorintsiegite.”

<sup>3</sup>Impo irirori ikemakera okogakera Jesavere ogakagantakerira itsaroganake ikaviritapanuta ishigapitsatanakarora. Onti iatake Veeresevaku nankitsirira Joraku. Ario kara iokanakeri ironampirira.

<sup>4</sup>Kantankicha iatake irirori ikenanakera osarigagitetapaakera ovashi inavaganake shavini impo ipirinitapaake otapinaku inchato paitacharira eretama ikantakerira Tasorintsi ikogakera inkamakera ikantiri: “iNotinkami, intagatityo natsiperei! Atsi gamagena, nonkamanaetari impogini ariompa pogamagakena maika nonkañoiganaemparira yashikiiganakenarira ikamakera. ¿Matsi navisaigakeri iriroegi gara nokami?”

<sup>5</sup>Impo inorianaka ovashi imagake. Impo osamanitanakera ikemi itsagatapaaikeri isaankariite Tasorintsi ikantiri: “Atsi tinaanake pisekatakempara.”

<sup>6</sup>Ishonkavetanaka igitoku ineiro pan tashitaka tsitsimenkiku ontiri nia pirinitakotake. Itinaanaka ipirinitake isekatakara yoviikakara, impo akiro imaganai. <sup>7</sup>Impo ipigashitaari isaankariite Tasorintsi itsagatapairi ikantiri: “Tinaanake pisekatakempara piavagetaketari samani.”

<sup>8</sup>Itinaanaka isekatavagetakara, aikiro yoviikakara, ovashi oshintsitagakeri iatakera yanuiintevagetanakera avotsiku 40 kutagiteri ontiri aikiro tsitenigetiku teratyoto irimagumate kigonkero yogonkevetakara otishiku paitacharira Oreve ikoneatimotakerira Tasorintsi Moisheshi pairani. <sup>9</sup>Ario kara ikianake imperitanakiku imagakera. Impo iniakeri Tasorintsi ikantiri:

—Eriashi, ¿tatatyoto pantakera aka?

<sup>10</sup>Irirori ikanti:

—Onti nopomirintsivagetakarora nontsatagetakerora magatiro pikogagetirira, vintitari Tasorintsi Gaveavagetatsirira. Yogaegiri maganiro iseraereegi yapakuaiganaimpira tenigera intsatagaigaero pikantagetirira. Iokageigakero itagantapiniigavetarira piratsipage yamapiniigavetimpirira, aikiro ipogereaigakeri yogaigakerira maganiro kamantantaigatsirira kematsaigimpirira. Panivanisanotyoto nokantakara naro notimaira. Maikari maika ikogaitakena irogaitakenara naro aikiro.

<sup>11</sup>Irirori ikantiri:

—Maika kontetanae paratinkakera kara sotsi otishiku, ariotari nonakeri naro.

Impo yogari Tasorintsi yavisanake aióni. Ogatyoto okenake otampiamatanaketyoto omarane tampia jiririririri otiguronkagematanaketyoto mapupage kara otishiku, kantankicha teratyoto iroro inkenantempa Tasorintsi. Irorotyoto opeganakara tampia ariokatyoto ontininkanakara tinin tinin tinin, kantankicha teratyoto iroro inkenantempa Tasorintsi tininkari. <sup>12</sup>Impo irorototyoto opeganakara tininkari irorokya poamatanankitsi tsitsi, kantankicha ario okañotaka irorori teratyoto iroro inkenantempa Tasorintsi. Impo iroro otsivakanakera tsitsi ikemi oniinkani amatsinkatsavagetunkani. <sup>13</sup>Iroro ikemavakera itikakomatanakatyo ivoroku imanchakiku yogakerira enoku ikontetanakera yaratinkakera sotsimoroku. Impo ikemi iniakeri Tasorintsi ikantiri:

—Eriashi, ¿tatatyoto pantakera aka?

<sup>14</sup>Irirori ikanti:

—Onti nopomirintsivagetakarora nontsatagetakerora magatiro pikogagetirira, vintitari Tasorintsi Gaveavagetatsirira. Yogaegiri maganiro iseraereegi yapakuaiganaimpira tenigera intsatagaigaero pikantagetirira. Iokageigakero itagantapiniigavetarira

piratsipage yamapiniigavetimpirira, aikiro ipogereiaigakeri yogaigakerira maganiro kamantantaigatsirira kematsai-gimpirira. Panivanisanotyo nokantakara naro notimaira. Maikari maika ikogaita-kena irogaitakenara naro aikiro.

<sup>15</sup>Irirori ikantiri:

—Maika piatae pinkenanaera osarigagi-tetapaakera Iramashikoku. Impo pogonke-taempara pisagutapaakerira aseiteku Asaere pimpegakagakerira igoveenkari-egite Suriakunirira. <sup>16</sup>Yogari Jeo itomi Nimishi onti pisagutakeri pimpegakagake-rira igoveenkari-egite iseraereegi. Impo irokya Eriseo itomi Sapate timatsirira Averimeoraku onti pisagutakeri pimpega-kagakerira kamantantatsirira impugaem-pira. <sup>17</sup>Tyanirika garira yogiri Asaere irokkyatyo gakerine Jeo. Impo garika yogiri Jeo irokkyatyo gakerine Eriseo. <sup>18</sup>Kantankicha maika aiñokya inai-gai iseraereegi 7,000 terira intigeroaventumai-gempari Vaare, aikiro tera irasaraanaigem-pari. Irirorogi pinkante gara yogagani.

### Eriseo

<sup>19</sup>Impogini iatake Eriashi ineapairi Eriseo itomi Sapate kigavatashivagetake impankitakera, itentaigakari pashini 11 iromperaneegi. Paniropage yantavageta-gakeri piteni toro inoshikakagakerira kigavatirorira kipatsi. Yogari Eriseo iro impogitasanotanankitsi. Impo yagapaakerora Eriashi aiñoni inakera irirori ipashitantapanutari imanchaki yogirira enoku. <sup>20</sup>Irirori ogatyo ikenake iokapanutiri toro iatakera ipatimatava-kerira ikantavakerira:

—Atsi noatapanaatera nonkamantapa-nuterira apa ontiri aikiro ina, impo nompigake nogiatanakempira.

Irirori ikantiri:

—Nanityo piatetyo. ¿Matsi tyara nokantimpi?

<sup>21</sup>Ovashi iatake yaganakerira itorone yantavagetakagakerira yovetisagetakerira. Yagakero ikigavatantakarira itagashitan-takarira yonkotantakarira ipaigakerira maganiro isekataigakara. Impo iatake ineairira Eriashi ovashi kantaka inakera iiroku imutakovagetakakerira.

*Impogini yogari Akave yomanatava-kagaigaka itentaigakarira Suriakunirira impo irirorogi yagaveiaigakeri yogaigakerira. Impo irokya pugairi itomi paitacharira Okosuashi. Irirori yovetsikake posante terira onkametite. Ario ikañogaka maganiro iseraereegi irirorogi atanatsityo yovetsikaigira posante terira onkametite ishiriagakogeigamatatyto tovaiti.*

### Atanatsira yovetsikagisevageiganake iseraereegi

**22** <sup>41</sup>Antari ipegakara Josapate igoveenkari-egite iyashikiiganake-rira Jora, yogari Akave atake ishiriagako-tanaka 4 shiriagarini ipegakara igoveen-kari-egite iseraereegi. <sup>42</sup>Yogari Josapate onti ishiriagakotaka 35 shiriagarini ikyaenkara tsititanakero ipegakara koveenkari, impo ipegaka koveenkari Jerosarenku 25 shiriagarini. Ogari iriniro onti opaita Asova. Inti shintotaro Suri. <sup>43</sup>Irirori onti ikañotaari iriri ikematsati-rira Tasorintsi itsatagetakakerora ikantagetirira, panivatityo kantankicha tera iokagetero itagantaganirira piratsipage otishipageku nerotyo yogaegi iyashikiiganakerira Jora atanatsityo iatapiniigira anta itagapiniiginirira Tasorintsi piratsipage ontiri kasankapa-neri. <sup>44</sup>Impo yogametiari Akave igoveen-kari-egite iseraereegi. <sup>50</sup>Impogini ikamanaira Josapate onti ikitataagani Jerosarenku itimavetara Iravi. Irokya pugairi itomi paitacharira Jorame.